

PATRIARCHATUS CONSTANTINOPOLITANI. 207

¹ Cappadocia secunda à Valente in odium D. Basilii facta, habet ab Occasu Lycaoniam, à Septentrione Cappadociam primam, ab Ortu Armeniam secundam, & à Meridie Isauriam & Ciliciam.

Galatiæ primæ termini sunt à Septentrione Paphlagonia, ab Occasu & Meridie Galatia Salutaris, & ab Ortu Hellenopontus.

Denique Galatia secunda seu Salutaris habet ab Ortu Galatiam primam & Cappadociam primam, à Septentrione Honoriadem & Paphlagoniam, ab Occasu Phrygiam Pacatianam, & à Meridie Pisidiam & Lycaoniam.

Thraciæ tertiæ Præfecti Diæcesis, inquit Ammianus ^a, nunc cernimus loca formata in cornuti sideris modum, effingunt theatri faciem speciosam, cujus in summitate Occidentali, montibus præruptis densata Succorum patefcunt angustie Thracias dirimentes & Daciam. Partem verò sinistram Arctoïs obnoxiam stellis, Hemimontane celsitudines claudunt, & Hister, qua Romanum cæspitem lambit, urbibus multis, & castris contiguus & castellis. Per dextrum quod Australe est latus, scopuli tenduntur Rhodopes: unde Eoum jubar exsurgit, finitur in fretum, cui undosis ab Euxino Ponto labenti, pergentique fluctibus reciprocis ad Ægeum, discidium panditur terrarum angustum. Ex angulo tamen Orientali Macedonicis jungitur collimitis per arctas præcípitesque vias, quæ cognominantur Acontisma. Brevius dicam à Septentrionibus terminari Danubio, ab Occasu Dardania & Dacia, à Meridie parte Macedoniæ ad Nesi fluvii ostium, & Ægeo Pelago usque ad Propontidem & Hellespontum, ab Oriente vero Hellesponto, Propontide, & Ponto, vel ut alii volunt Tanai fluvio.

Hujus, teste Sexto Rufo ^b, in ditionem Reipublicæ sex Provinciæ sunt acquisitæ, Thracia, Hæmimons, Mœsia inferior, Scythia, Rhodope, Europa, in qua ut ait secundæ arces Imperii Romani sunt constitutæ Constantinopolis. Europa ad mare porrecta, ab Ortu terminatur Propontide, à Septentrione Ponto, ab Occasu Hæmimonte & Rhodope, à Meridie mari Ægeo. Thracia ab Hæmo monte ad mare Ægeum protenditur: à Septentrione habet Mœsiam secundam, ab Occasu Daciam & Dardaniam, à Meridie Macedoniam & mare Ægeum, & ab Ortu Hæmimontem & Rhodopem. Hæmimons inter Mœsiam secundam & Europam est: ab Occasu Thraciam habens, à Meridie Rhodopem, ab Ortu Europam, & à Septentrione Mœsiam secundam & Scythiam. Rhodope ab Ortu Europam habet, à Septentrione Hæmimontem, ab Occasu Thraciam, à Meridie mare Ægeum. De aliis duabus Provinciis jam libro octavo, ubi de Illyrico Occidentali diximus.

Hæ omnes Provinciæ à Præfecto Prætorio Orientis regebantur: qui & Diæcesis amplitudine & dignitate eminens primus appellatus ^c, licet univ-
erso præesset Orienti, tamen ut plurimum in Principis Comitatu sedebat. Sub eo unicuique majori Diæcesi singuli majores Magistratus præficiiebantur: Orientis Provinciis quindecim, Comes: Ægypti sex, Præfectus Augustalis: tribus Asianis, Proconsul: & octo aliis, Vicarius: Ponticæ undecim, Vicarius: & Thraciæ sex item Vicarius. Quod autem ad Provincias spectat singulæ à singulis Præsidibus, Præsidum latè sumpto nomine, administrabantur, ut ab omnibus disci potest in Notitia Romani Imperii, ex qua Tabulam hancce confecimus.

In

NOTÆ LUCE HOLSTENII.

¹ Cappadocia secunda] Metropolis ejus Tyana. Sed postea Mocifus ad hunc honorem provecta à Justiniano Imperatore, ut testatur Procop. lib. v. edific. unde & Justiniani nomen tunc accepisse videtur. Neque enim alia est à Mociffo ἡ Ἰουστινιανῶν μητρόπολις τῆς δευτέρας Καππαδοκίαν ἐπαρχίας in Concilio Constantinopolitano sub Agapito & Mena Act. 2. pag. 691. Colon.

IV.
THRACIÆ DE-
SCRIPTIO ET
PROVINCIAE.
^a Ammian. l. 27.

^b Sext. Ruf. in Brev.

^c Cod. de P. P. Orientis.